



學菴類稿目錄

青浦 王原

公牘類四

茂名

第四卷 教令

禁靈湫山鑿石開窑 勸農力田教


勸民墾荒教令 舉行誣告反坐教

申諭士子 署信宜曉諭百姓

署信宜講諭約 署信宜禁刁訟示文

署信宜禁違制揀錢教

署信宜申禁命盜借端蔓詐



傳諭信宜士子完糧限

舊糧銀穀兼收便民示文

准民自首冒荒令  
再申種樹令

均米取結榜文  
諭更換保正

開徵錢糧示諭  
禱雨諭民修省令

解任諭民文

學菴類稿

公牘類四

青浦  
王原  
深一字  
令詒

教令三  
茂名

禁靈湫山鑿石開窰

靈湫為縣境名山巖石晶瑩洞壑幽邃扶輿清淑  
之氣融結於斯向來早乾祈禱屢沛甘霖神靈所  
棲為邑望鎮查有姦民擅於山巔巖足私立灰窰  
挖鑿珉石投諸烈火以官山為私業但知射利罔  
顧鑿山損脈褻越神靈若不嚴行封禁雖盡茲山  
之石足填姦民之貪壑乎為此示仰該地方保正  
山民里老知悉嗣後如有違禁開窰私採山石立

行稟拿以憑究處現今雨澤愆期憲行祈禱並着該地保速將靈湫龍洞內外處所榛莽細加芟除打掃潔淨徑路修填平闊預備親臨虔禱雨澤各宜凜遵毋違

勸農力田教

照得春耕夏耘貴及時用力庶望有秋茂邑農民偷安成習禾種入土聽其自生自長雖有天時雖有地利人力不勤倍收何自本縣厯念農功不遑寧處星言夙駕親履田間相度土宜躬爲勸導其有用力多而田禾遂長者此良農也其有用力少而田禾瘁痿者此惰農也分別勸懲俾知鼓舞爾

民各宜體本縣愛養百姓之心率其婦子盡力南畝將使家裕倉箱野無菜色民以有秋爲樂本縣卽以民之樂爲樂豈非幸生太平之盛事休戚一體之至誼乎特示

勸民墾荒教令

爲曉諭事照得茂名下坊荒逃累累比卯之時環庭哀訴本縣將悉從寬免乎 朝廷之賦額不可虧也將急其催科平民生疾苦又當恤也期爲民代償則薄俸無幾欲別行設法則無項可移焦心憂思仰屋無策惟有勸民耕墾抵納糧稅雖無補從前尚可支吾日後本縣業已出示招耕加之撫

恤猶恐爾民瞻顧不前趨耕無幾特乘政暇親行查勘除水衝沙壅石田難耕之外凡有拋荒田土可以開墾者不必定待逃戶回歸方行布種聽爾佃人擇其近便各量已力能墾若干計筭田米若干具呈本縣核取結狀給以印照前去耕墾三年之後將租抵糧不問舊欠不派差徭此田日後便爲已業他日業戶歸來不許告爭彼旣逋賦脫逃拋荒王土何得乘人墾熟便思復業本縣揆情執法斷不偏枯爲民作主不必顧慮爾民各宜踴躍乘此春時奮力鼓勇廣爲開耕即使錯過小熟尚有大熟桑榆可收毋得自悞至於向時里民有隱

匿熟田冒稱荒逃者許其卽時自首認納錢糧免其從前欺冒之罪如不自行出首被人告發者卽以所告之田給賞告發之人欺冒者必盡法治罪本縣愛民如子亦疾惡如仇苟不遵我言違犯我令三尺具在斷無復以姑息之愛望之本縣也慎之特示

舉行誣告反坐之法教

爲再申誣告之禁舉行反坐之條以儆刁頑以厚風俗事照得茂邑民刁健訟雖經本縣反覆禁戒無奈積習難改前經揭示與民約于出示兩月以後如有誣告者按律反坐入夏以來時值農忙兼

遇熟審不從寬矜釋卽准息免供反坐之律尚未  
舉行茲當八月初一日開期在邇恐爾民猶未遍  
諭尚望如前寬典執法伊始合再申飭爲此示仰  
闔邑士民人等知悉嗣後除口角細故不許成訟  
外凡有命盜姦拐等情與真正寃抑許赴考准代  
書處備述實情據事直書詞尾註明代書姓名戳  
記方准告理如有捏造大題逞刁誣告者審實定  
將元告按反坐律加等治罪斷斷不能以一紙和  
息遂了誣告之局也若詞無代書戳記一槩不收  
倘或代書聽從刁民不據實寫狀一併究責本縣  
期與爾民力反刁告之風共成無訟之化乃教訓  
數月不啻舌敝猶然逞其小忿輒興訟端梗父母  
之化害良善之人是乃民之蝨賊法所必誅爾等  
毋以身命輕爲嘗試慎之

申諭士子

照得宣講上諭元期與士民共繹王言歸於淳厚  
昨詳奉撫院憲批設簿二扇左簿登記紳士講諭  
會課來到姓名右簿登記紳士把持衙門干與姓  
名按季造報業經出示通知乃本縣朔望講諭之  
時紳士到者寥寥而蚤堂投文諸生呈稟無日無  
之本縣念爾多士上者須以道義自勉次亦應以  
功名爲重煌煌憲諭置若罔聞旣失居下之禮亦

非自愛之道本縣忝尹茲土有父母師長之職若不苦口相勉一至季終據實造報憲令森嚴恐致貽悔噬臍爲此再示曉諭各紳士於朔望講諭及會課會講一切興行教化之事務須齊集以爲庶民表率至於衙門詞訟地方公事不得干與有違憲禁目今秋風薦爽正燈牕誦讀之時轉瞬賓興青雲有路本縣塵牘稍清訂期於每月講諭之第二日一次會講一次會文本縣雖爲俗吏學業荒蕪然費二十餘年之苦心頗有一得可爲紳士他山之助多士幸自勉厲以古道相期庶不負本縣倦倦屬望之至意他日茂名一邑科第蟬聯文才

傑出爲粵省省日本縣亦與有榮施也

署信宜曉諭百姓

照得本縣奉憲委攝信篆查照信邑南關二里之外卽爲茂地茂信接壤聲息相聞凡本縣治茂之政諒爲信民所熟悉本縣卽以治茂者治信凡教民敦行勸民勤業禁民健訟重農桑興學校免差擾革陋規一切行之於茂者將次第行之於信本縣斷不以暫時攝事潦草塞責也爾士民各宜勉厲共遵教令毋負本縣愛民禮士之至意實有厚望特示

署信宜講諭約

照得臨民出治以教化爲先。皇上頒諭十六條，所以齊同風化，至全至備。本縣署理茲邑，擇於本月某日，在於明倫堂宣講爾士民，至期齊集恭聽，須至示者。

署信宜禁刁訟示文

爲禁民刁訟以靖地方事。照得高涼健訟六屬同風，大抵借占墓拆婚人命強盜遺米壓米等項名色，究竟十無一真，徒滋詐害。本縣蒞茂一載，民情僞久已熟悉。今署信宜，始合行飭禁爲此示諭。合縣士民人等知悉，除一切細故小嫌皆聽親族鄰甲鄉老處和不得興訟外，其有真正人命強盜拐帶姦賭重情及官吏貪污詐贓屈枉積弊陋習，須當申究革除者，許赴代書遵照狀式謄寫於十四日告期投遞，以憑查閱。准理若有架題誣告陷害平民一經審出，定行反坐，決不姑貸。特示。

署信宜禁違制揀錢教

康熙制錢奉旨鑄造，上下通行，普天皆然。此地向來行用舊錢，卽一時不能革舊行新，姑從民便，照常行用，亦當新舊兼行。乃訪得市肆行使揀出制錢不用，單用舊錢，不遵國制，幾同化外。合行出示嚴禁，凡市肆貿易皆須新舊兼行，不許揀去制錢不用。自干法禁，取究未便，特示。

署信宜申禁命盜借端蔓詐

爲申禁命盜重情事主借端蔓詐事照得人命至重而高俗輕生盜乃極惡而高俗易犯合行特示禁飭嗣後如告人命者須開明月日傷仗証見事由必真係謀故毆殺方許投告至如投井自縊服毒皆不在抵命之例不得妄指逼勒誣扳相毆自罹反坐之罪如告賊盜者須兼同兩鄰排甲驗確行劫之時來踪去跡盜數多寡有無失物一同赴告其有虛張賊數妄開失單詭稱鄰甲不救過村坐視希圖嚇詐者定行重究有能當場擒拿賊盜送官者從重給賞特示

傳諭信宜士子完糧限

諭儒學該值門斗某某等資本縣名帖立即分頭致送某紳衿各位傳道新舊銀米抵撥兵餉檄催如雨萬分緊急祇因兩月缺官以致墮悞今本縣蒞署立待移解士爲四民之首務期率先急公今本縣立法行催省差免累酌量分作三限自本月十七日爲始初限十日內各年銀米差務照欠先完一半次限十日內又照餘欠再完一半三限十日內盡數全完其依限完納者免其差催不必赴比不遵者專差追比特先遣役傳知各宜遵照各取回帖繳限某日內通傳如遲究責特諭

舊糧銀穀兼收便民示文

爲嚴催舊欠錢糧酌從民便銀穀兼收以完積欠  
以赴考成事照得三十二三年錢糧奏銷限滿考  
成嚴切難容刻緩本縣查得茂邑糧戶全賴賣穀  
易銀當此成熟之際誠恐小民將穀變賣傾銀下  
櫃擔閣時日兼之秋成穀賤賣者多而買者少必  
至減價賤售未免虧折本縣念切民艱再三籌度  
酌從民便除有銀者仍令照舊完銀外如有擔穀  
入城一時不得賣銀完納者許即將穀上倉令倉  
書驗係乾淨好穀卽平斛收受悉照市價估計銀  
數給以小票令赴櫃截單作完至於三十二三年

所欠糧米除有米者仍令照舊完米外如無米亦  
准以穀二石作完米一石倉書給米串作完爾民  
不至守候時日虧折價值本縣代爲召商發賣易  
銀解司官任其勞民享其逸實本縣曲體小民之  
至意限于十月初十日爲始合行示知爾民趁此  
收成之日各照欠數不論銀錢米穀作速盡數完  
納如再遲延定行簽拿枷責重處不恕特示

准民自首冒荒令

爲特准冒荒瞞墾自首免罪以昭撫恤以足額賦  
事照得茂邑兵燹之後人民逃散田地盡成丘墟  
廬舍鞠爲茂草以致田糧每多缺額今昇平日久

哀鴻已集漸次歸墾故業還復舊居卽有未歸之戶現住人民亦多開耕種植田地不致拋荒貢賦自當足額矣乃本縣蒞任將及二載每於查比之際爾民往往以荒逃爲辭虛懸糧餉無從致問揆厥情由皆因從前硬當里役以一年而供十年之差以一石而供數十石之役其有私耕逃戶之田皆姦猾之輩勾通里書衙役瞞隱不報以爲躲避大役之計是致虧空正供牽連賠累雖事干法紀而實則情尚可原兩年以來本縣力行均差受田之家毫無苦累兼之分立花戶自行投納雖孤兒寡婦皆可安坐業田當此之時而猶不思呈認是

真姦惡頑民有心犯法矣本縣猶念爾民見識短淺不忍遽加之法特開自首免罪之路如再不遵方以大法處治不但本縣之心安爾民亦甘心受罪而無怨合行出示通行曉諭二十八里士民人等知悉如有隱匿逃戶田畝及私自開耕墾多報少或經呈報開墾而瞞稟復呈或墾熟假逃又呈歸墾或欺隱熟糧而冒指不稅山坡石田砂角爲賠荒賠累或指萬曆年間久免老荒爲額田難種蠲免熟田糧差種種積弊務宜盡數首報毋得欺隱絲毫本縣以愛民爲心至真至切但有自首槩免前罪其積年錢糧租穀槩不究追倘有怙終不

俊仍踵前轍不首不報者本縣現在密行採訪一經查出或被旁人告發定行按律治罪里長里書一併連坐決不姑貸至於里長戶長里書一應人民有能將贖耕冒荒之田查確首告者即將所首之田給爲己業其贖耕之人從重治罪法在必行各宜凜遵

再申種樹令

照得本縣下車令民道旁栽種榕柳以蔭行人以免炎暑侵逼道路暍死乃查閱各處已種者率皆枯株弱幹淺插立槁而未種之處十有八九昨按行所至惟梅菴至沙院一帶所種之樹森然成林

而淋水山東北一帶種亦得法此外彌望空坡此豈盡里民之違玩乎抑該捕巡奉行之不力也方今大雨時行農功畢舉播種之隙正可樹藝爲此牌仰該捕巡官役乘此雨後速令該地方保甲長查照大路之旁相隔一二丈對插榕柳要擇青榦大如人臂長六七尺者鏟挖深坑鬆土埋種外遮棘刺以防牛羊踐食已生者更須常加護視毋使風雨摧倒未生者卽行逐一補種務於半月之內栽種完備取具各里甘結繳查不得陽奉陰違草率塞責如再違今限定提該捕巡差役究責不貸均米取結榜文

爲嚴剔撥米姦弊以杜漏糧壓派事照得按糧均役乃撫憲恤民至意業已按里按甲均勻配搭造冊申繳本縣因念爾民或有分析未清恐滋淆混許爾民據實呈明覆令里書就撥定里甲之內逐一查改以立爲永久無弊之法近訪有等姦猾戶長刁頑子戶凡遇甲內有倒畱米石及磽瘠疲頑之戶及本族有認賠均攤之米串賄里書籍均糧之際推出別里別甲或撥入逃戶脚下更有將甲內米石分列詭名米數或灑派他人名下任意受賄高下其手或多認以圖影占或少認以圖卸壓種種叢弊以爲莫可根究殊不思錢糧一出入

自有底冊可查來自何戶分自何人弊從何起改係何手水落石出一察瞭然且糧米關係國課一有不明里書典守之責其罪難逃本圖利於一時實貽害於後日損人適以損己後悔便同噬臍除目前嚴加查核不許絲毫舛錯如有違悞立行究責外合取各里書戶長認罪結狀存案備查爲此示諭各里里書戶長人等知悉即便遵照速將配定米冊註明某戶係從某里某甲撥來某戶係從某甲某人分出逐一謄造清楚凡係米多甲戶撥米出甲分米立戶及米少甲戶收併別戶彙造一戶者該戶長結明一甲之內並無假捏逃亾故絕

詭名將倒畱米石推累別人及多收少認通同高下等弊事發認罪甘結該里書亦具一里之內並無朦朧混造逃亾故絕詭名移多減少受賄作弊事發甘罪結狀定限本月某日逋赴本縣以憑立案存查嗣後倘經本縣察出或被本人告發每逢比限但有推諉不明之處卽係賄弊發覺一併治罪斷不饒恕至於具呈懇改懇分人戶務令各戶齊至冊局面同對明的確方許分戶併戶註冊更正毋得止據一面之詞擅自那移改易致干罪戾各宜凜遵毋違

諭更換保正

示諭闔縣保正知悉向例十月更換保正今已屆期着各該地方公舉新保正先期遞呈限於十月十二日新舊保正一同過堂查點更換其有舊保正堪復充一年者亦聽公衆保舉如有應換不換應保不保及鑽營公舉偷安推諉者察出一併究治本縣涖任一載保正良歹皆已熟知爾等務須秉公倘有借稱更換科索一文者查出立時處死各宜慎之毋自取咎戾特示

開徵錢糧示諭

三十五年錢糧奉撥兵餉按月支給皆有定限今當春首開櫃徵收合行出示通曉爲此示諭闔縣

業戶民人知悉擇于二月初一日開徵三十五年  
錢糧爾等各宜遵照本名銀米數目按月按分完  
納如照分數完納者本縣一如上年免差免比皆  
本縣已行之良法爾民久已熟知但期爾民比上  
年益復踴躍急公先期赴納上有愛民省費之心  
下有奉公守法之效上下相成豈非盛事本縣在  
任一載爲爾民力行均差之良法永除硬當之積  
弊飲冰茹蘖刻苦自甘爾民各有心胸各具耳目  
試思從前之孤兒寡婦貧戶單丁有能如今日之  
衣租食稅者乎試思從前姦棍蠹胥財主勢家有  
能如今日之屏跡斂手者乎試思從前之脂膏歸  
公帑者十之一填私壑者十之九今猶有此弊乎  
試思從前之里役强者坐享無米之田弱者重納  
無田之米今猶有此弊乎當此之時爾民尚欲拖  
欠糧銀貽累父母恐光天化日之下不宜有此逆  
理喪心之人其共思之其共勉之毋忽

禱雨諭民修省令

三春無雨播種維艱本縣軫念農功中心焦悴近  
隨本府設壇隍廟齋戒步禱未沛甘霖本縣又復  
引咎責躬繕詞明誓自甘天罰無累我民遍告城  
隍關帝先太夫人諸祠焚章叩祝冀回天意但念  
天災流行不特爲之官長者宜省身克己卽爾等

紳士商民各宜改過遷善無干天和是用告爾民衆自初九日爲始各宜禁止屠宰齋戒修省每家門首供設雨師神位每日清晨隨本縣詣各祠拜禱務殫實意勿視具文庶望感格上蒼甘霖蚤降須至告示者

解任諭民文

爲再瀝苦衷勸諭事照得本縣蒞任茲土正當差役更變之初公務紛繁之際本縣日擊民艱矢心天日革除陋例力行均差年餘以來督憲道憲學憲先後經臨府憲署憲遷陞三易礮穀解省捐解俸工或數年而一見之事或數十年而一見之事

畢聚於此數月之內本縣事事躬親料理無一絲一粟派累小民務使孤兒寡婦皆可業田客戶逃丁爭歸闢土至於民俗素鮮教訓刁訟繁興驍悍嗜利盜賊時有本縣先禮教而後刑罰事無大小不憚煩勞舌敝唇焦委曲曉譬教之以人倫厲之以廉恥卽有違犯不忍遽置之法化大事爲小化有事爲無兩造備至虛公聽斷屏絕苞苴不受請託惟恐枉責一人惟恐枉斷一事雖未敢云事事悉當於理要可自信事事無愧於心尤念士爲四民之首會講課文勤加勗勉無非聖賢相望冀以易俗移風邇者無情之辭日以鮮少剝刦之輩旋

報擒拿絃誦之聲相聞獷悍之習稍變至於保正更替里長出役里書編徵行戶供給查造烟丁投遞月結一切公費公堂舊時例規盡數革除諸凡境外公出不起一役一夫不擾一草一木稍爲百姓畱其有餘不顧公用處于不足分列限單以別良頑錢糧早完者經年不赴一比立法免差以杜拘擾元被願息者銷票不煩片言無非惜民之力省民之財本縣自甘清淡布衣蔬食疲精耗神不顧劬瘁寧官貧而望民以富寧官病而予民以安此本縣盟心幽獨矢志鬼神以民事爲家事以民心爲己心不敢自欺以欺人務期損上而益下之

一點婆心也本縣幼奉庭訓長師古人頗思抒其所學少異俗吏之爲厚自刻苦毫無怠悔豈期未及兩朞忽遭望悞向所施行雖已條綱畢舉猶未適觀厥成此本縣所以臨去之際不忍不再申勸勉也爲此示諭闔邑士民人等知悉諸凡平日訓誡之言皆欲爾士民敦倫守分平忿息爭各宜三復勿忘以臻善治方今各上憲政簡刑清愛民如子爾等但能爲士者閉戶讀書爲民者急公奉法勿利己而害人勿背公而行私勿倚強而陵弱勿見利而忘義勿興訟而廢業勿賭博而蕩財勿欠租糧勿好鬪狠勿賴婚姻勿爭墓地父慈子孝兄



缺卷5

友弟恭敦睦鄉里教訓子孫豈惟不犯官刑亦必  
上邀天祐從來孝弟之人子孫必昌勤儉之家衣  
食自足本縣諄諄告戒無非愛民心切不因謝事  
在卽遂置斯民於度外而不爲之耳提而面命也  
願爾士民共思吾言共勉爲善勿負本縣爲民父  
母之苦心亦不失爾等子弟率教之美意勗哉毋  
忽

學菴類稿目錄

公牘類六

茂名

第六卷 讞案

張有標違斷橫行

詳銷黃鎮鑑疑獄

黃輔黃鼎捏名納單朋誣黃藩

張官哥誣告母舅曾之庾

詳銷潘鉉告舊事

陳心貴冒指屯田

生監忌才妄攻本籍

黎翼朝納單誣壓余

志賢完糧

盧愈賢僱人代考

青浦

王原

深 二字  
今詒

悍兵張雄誣告井死移營案

粵女黃氏殺姦夫 何活崇服毒

黃科李華廷陳永科朋謀誣命

龍著圖冒兵左控 黎翼朝覆告余志賢

斷出陷僕李向榮 謝舜曆等借縊告命

丁令畔僕 梅棻建開

斷定獾總 廖信智駢殺姦夫姦

婦詳府

學菴類稿

公牘類六

青浦 王原 深一字令諭

讞案二 茂名

張有標違斷橫行

審得高涼天末蠻邦人情刁惡然未有如張有標  
梁萬能梁上茂等之目無官長恃眾行兇者也梁  
上茂與陳奇許告爭地業已審明乃有標以耕丁  
包占上茂之塘地而指陳奇之業以抵飾上茂忽  
起風波哨集張梁之族多眾萬能恃老率先張學  
昌侍充保正為之贊畫突將陳奇塘魚盡捉一空  
坡地蔓葉盡行鋤毀有標下種占耕向來出入行

路封斷禁走經奇控訴召問鄰人事事皆實似此行徑幾同亂民念係山蠻無知姑從寬分別柳責免其問罪如後再犯併科可也

詳銷黃鎮鑑疑獄

看得康熙三十一年八月黃鎮鑑之父黃國興之死也不知其死於盜死於仇抑死於病也國興之族弟國有經歷司皂隸也國興之子鎮鑑旣壯矣國有欲假兄死以居奇同呈左控伊本官申報前府金批縣審訊旋出捏名白帖指爲移屍株連親戚牽累地方歷審事跡總屬虛無累死三人淹獄四載當時旣未確驗屍傷何狀亦不詢究白帖何

來疑獄久懸人情冤苦迨今復據鎮鑑控前府魏陳墾斷墓牌行縣審結案職遵卽喚齊各犯逐一研訊丘國華與國興兒女姻親並非仇隙丘子乾先雖躲避後已出審據其供吐不過畏累初無別情至於李自高黃相亦與國興素日相好及究干証劉鼎科鍾麟趾驗看傷痕已是腐屍望揣棍傷豈爲信案食烟挑擔之証亦止道路邂逅究竟致死之故致死之人全無影響惟據國有呈驗白帖爲憑細訊白帖得之國有此非國有之贗造暗中卽旁人之挾仇嫁禍耳若執此羅織是中姦計而長刁風也如欲從白帖以得兇人先須執白帖以

查來歷欲廣構下手致命之兇犯先須檢確致命之屍傷乃從前憑虛詰問則國有利口執辨不啻懸河及職核實推詳則國有叩頭願息復如崩角其中隱情已不待辨而決矣惟是鎮鑑父死道路暴屍三載陳情願葬哀懇再三似不便過爲推求合無允其收葬案內諸人槩予省釋以銷塵案併應否着令里甲及案內諸人量助掩埋之費職未敢擅便統候批示遵行

黃輔黃鼐捏名納單册誣黃藩

審得茂名之田無步口無號數故多寡不可辨也實徵册籍止開戶長之名不列花戶其完糧串不拘姓張姓李名甲名乙湊足戶長總數而止此爭田之訟日紛紜而莫可致詰也如黃藩買受黃鼐之塘契不載米而黃鼐與黃輔親房也黃輔自遵三跳入遵一將黃鼐捏立詭名納有糧單遂唆黃鼐以遺米誣告黃藩不知民間授受以契爲憑契不書米而云有遺是黃鼐自遺非黃藩之遺也且事在康熙元年越三十餘年而始告康熙二十年黃輔罷遵三過遵一之時無一言也塘在遵三而云遺米在遵一種種誣罔皆鼐與輔朋比爲姦憑空捏造本應究擬念逢熱審責逐立案

張官哥誣告母舅曾之庾

看得張官哥張文魁高日科等三詞合控曾之庾等滅孤蠹殺一案奉憲轉發職審擬隨經逐一備細研訊其告會之庾於康熙十五年間奉督院金委授東安訓導呈驗委牌可據則之庾乃外委之員即使從前曾受偽劄既奉督院牌委應在投誠之列未可遽以偽官論也又告稱曾之庾將官哥母子投獻藩官馬都司審據原媒余麟圖之父重文供稱康熙十七年因馬都司調汎駐高官哥之母曾氏情願改嫁伊姑黃氏主婚領聘查曾之庾奉委在十六年而曾氏之嫁在十七年則非脫罪投獻也明矣至若告之庾包占田租二百餘石遺

糧米五石三斗歷年賠累歷訊高日科張文魁等俱不知包占實情但供據張官哥說係曾之庾包占所以控告查此項田米向係張國寧戶名完糧張國寧卽官哥祖父戶名也曾之庾所受張氏七契田米八石九斗七升查冊俱經收割無遺隨委捕官前往查勘張官哥所指包占土名及捕官呈覆併各佃丁供稱租穀米數悉與之庾契內相符之庾似無包占之情而張官哥堅稱有田無米指定這鴨長田謂之庾包占而官哥向日程令任內當堂領銀自立續契這鴨長田俱開載在內而官哥又供續契係母舅壓寫之庾供稱五石三斗之

糧米官哥自有荒熟田租隨訊開出各佃丁供稱  
熟田之外荒田纍纍悉係官哥完糧則此五石三  
斗之糧米乃官哥賣存之瘠產亦未可定但未逐  
坵勘實無以塞其狡口查高屬田地計米徵銀並  
無四至圖籍步口畝數勢必履畝清丈此項田米  
方有歸着五石三斗之米約田一百三十餘畝俱  
係山岡沙角非比平土坵段零星四散離城六七  
十四五十里不等非累月經旬不能徧此職所以  
有寬限之請茲蒙憲催完結職遵查此際青禾遍  
野弓步難施竊慮有妨農務未便造次伏懇憲臺  
詳請撫憲俯賜垂念農工未畢難以勘丈俟十月  
刈獲之後再寬一月逐細查明方可定擬詳結爲  
此備錄口供具申

詳銷潘鉉告舊事

審看得潘鉉茂邑健訟黠民也上年五月內有李  
承顯與梁應奎因爭寡婦起隙訟於署縣徐丞潘  
鉉以主唆受責枷示復立惡人牌潘鉉聽李貞夤  
緣事露署縣追銀四兩發修城隍廟潘鉉以疊受  
刑戮妄思報雪於憲駕巡高之時以侵官噬民事  
詞上控蒙批仰職審明連人解報遵卽拘喚一千  
犯証逐一研訊據潘鉉供稱交銀一十五兩外錢  
一十八千文在梁璉家交託李貞送官據李貞供

稱追出銀四兩係潘鉉身上取出而銀一十五兩錢一十八千之說歷訊干証皆無實據徐丞告示所指追錢八千發修城隍廟據廟祝陳佐國供卽此四兩之銀之折數至於李承顯不過退糧營兵寄居郡城沽酒爲活詞稱交官袖狀尤爲虛誕又告稱潘梓妄扳及侯科勒詐錢一千四百文據潘梓供稱潘鉉本屬弟兄唆訟陷害潘鉉亦供當日兩事併審所以告他究無實寃再研訊侯科勒詐情由委無得錢之事潘鉉亦供原未有交錢是實更無証見事屬無憑是潘鉉止以受刑過當逞詞圖報所告惟李貞詐騙一事未爲全虛其餘皆係影響潘鉉李貞本應按律招擬但查李貞詐騙潘鉉行求發覺在前俱經署事徐縣丞審追枷責應否均邀寬典免其定擬職未敢擅專相應連人解赴憲臺審奪批示遵行

陳心貴冒指屯田

審得陳演泰與已故陳心貴互爭低屯村秧地池塘也演泰以民業控縣心貴以軍田訴衛庭訊之下演泰呈出印契查係伊祖陳朝鳳于嘉靖二十五年十月初一日用價買梁敬梁琚之田契內開載低屯坡脊茅園塘地四至分明炳然可據及詢田鄰各供此地與軍田尚隔一崗初非連蠲畝界

軍民攸分歷來無混第因康熙二十一年陳演泰避役逃去田地拋荒無主陳心貴乘荒于電衛批耕繼而演泰歸復此田仍歸演泰此時心貴天良猶未泯也事後心貴垂涎雞肋忽于舊年稟衛希圖爭取此演泰所以有串軍占殺之控也查演泰印契鑿鑿衆証昭然而心貴之子譽科全無執據惟呈電衛票示一紙查票係康熙二十二年給化茂九屯佃戶者示係二十五年給四所各軍及佃丁者皆爲免派雜差而設並無指此地爲屯田也至於心貴承耕批帖係在二十四年出于屯甲楊玉枝之手正值演泰逃避無主之時若乘機便可永據則凡逃戶之田皆可按籍而收矣始雖批耕後卽退歸則此田實係民田而非軍田亦已明甚陳心貴告後已經病故其子譽科簿懲示儆田塘仍着陳演泰照契管業餘皆省釋存案並移衛飭令屯甲軍丁永杜爭端可也

生監忌才妄攻本籍

看得查禁冒籍元屬功令但有真正冒籍方許呈明提調不准送考未有糾黨聚衆肆行毆打且指本籍之人爲冒籍挾仇忌才而可以無禁者也今遇憲臺奉命臨高考較茂邑好事生監先于二十三日遍貼報單聚集隍廟一呼百應彼唱此和已

非儒者氣象及至二十十六日憲臺考試茂名化州  
二屬童生又將本籍之林培成植品妄指爲匿喪  
擒毆幾斃甚至攔截數十人在外不許入試全無  
忌憚致奉查詰職遵諭查訊爲首之人及化州攔  
阻貢生供吐在案理合錄供解候審奪職更有請  
者高郡貢監生員向沿陋習未經教訓以致越規  
事雖有犯情實可矜應否仰邀寬宥發學戒飭免  
其褫革究擬懲前毖後俾知畏法雷霆雨露皆出  
憲恩職未敢擅專

黎翼朝納單誣壓余志賢完糧

審得余志賢延二一甲戶丁也順治年間曾將田

米二石六斗賣與隆四九甲戶丁余英標收割過  
戶業已三十餘年迨後英標戶絕田歸隆四里長  
黎翼朝批耕取租現有佃人可質固無疑義矣但  
黎翼朝父子相承久踞里長所有本名荒米計思  
飛灑先於英標割歸之時詭完余志賢糧單以爲  
張本今當開造花戶之時又令里書開造志賢之  
父余家祥戶名指爲有米不完欲令認納蓋思得  
志賢認納一分翼朝可自省一分荒米之累也不  
知志賢無田在隆四九甲不過元賣之田係英標  
之業業戶旣絕田歸翼朝無故而欲壓令認米以  
代桃僵有是理乎今查余英標之田黎翼朝已令

伊姪黎煥賣與坊內九甲陳朝海稅歸過割矣則隆四九甲詭開余姓之米應着黎翼朝完納錢糧其詭立戶名妄思壓累律應究擬因逢熱審姑開一面懲責立案可也

盧愈賢僱人代考

看得高州濱海荒郡禮教未馴與內郡懸殊所以民間子弟讀書通文義者寥寥一遇考試輒僱他郡無行書生代考以圖僥倖此歷來難破之積習也今幸憲臺冰鑑高懸有姦畢照代考之人聞風斂跡乃猶有愍不畏死如盧愈賢林仍潘衍泗程式頤其人者若非憲臺覆試查出發審除名則魑

魅姦計何由而破當經申詳奉批嚴審招擬職遵審盧愈賢供聽貢生潘衍泗勾引請伊甥林仍代考出銀二十五兩親交潘衍泗轉交林仍有潘衍泗家教讀程式頤居間領約呈驗事發之後交回一十二兩尚一十三兩應追又出錢六千文交潘衍泗央請廩生賴士標保結未經收受程式頤俱供認不諱雖潘衍泗恃貢狡辯然衆証明白卽同獄成所應詳請咨部褫革刑訊招擬併關提林仍到日與盧愈賢一併追贓問罪者也至於賴士標始雖認保覆試之時又經許稟且錢未入已應否免其褫革出自憲恩非職所敢專者也

悍兵張雄誣告井死移營案

審得兵丁張雄之子張儒廣墮井身死張雄指稱其主潘士鳳毆死投井先准貴府公移卽批送戎糧廳相驗遍身並無傷痕手足指甲有坭取有供結前來而張雄逞刁復控鎮臺蒙批貴府移縣確查本縣又復親行研訊據左右鄰人趙定邦張志勇及儒廣之岳黃照龍皆供並無毆打亦無傷痕定邦志勇兵丁也照龍死者之岳也目擊耳聞見証的確莫三人若也且井在守府衙門之內雖至愚之人亦無以打死之人輦入衙門投井之理張雄惟恃其刁憊庭訊之時咆哮無狀及訊其確証

則又毫無指實若以墮井之人任其圖賴是長刁也有是讞案乎至於士鳳訴稱六月初五夜被竊儒廣私開前門伊主細詰儒廣曾吐真情張雄適來詢知其故雄怒其子之實吐也欲死其子以圖詐士鳳士鳳謂其子之死雄逼之也此亦無根之論亦難據以深求總之井在公署死在白日主旣難輦父亦難逼儒廣屍棺着雄領厝詞內諸人俱行省釋可也

粵女黃氏殺姦夫

審得楊孔元新鰥黃氏舊寡兩家同居大井堡陳村四圍皆山鄰佑相隔山坡遼遠止此二家相去

不數武也黃氏有子大者出僱割禾幼者出僱牧牛六月初七日孔元乘醉趨姦黃氏黃氏不從孔元持扁挑欲毆非真毆也將以恐嚇俾其聽從爾何圖黃氏扭奪反擊二下傷其耳根腫脹於是孔元奮力身壓黃氏在地強欲行姦黃氏情極咬傷其手又扯裂腎囊囊破而死此亦孔元之自取粵女有若黃氏者此亦鐵中錚錚傭中皎皎矣但楊孔元無妻無子有族弟楊孔錫住又隔遠赤貧不能殮埋令黃氏出錢三千文給孔錫領屍殮埋之黃氏則予獎以厲淫俗餘俱省釋可也

何活崇服毒

審看得何活崇之死死於服毒也其服毒也圖以禍馮正亮也馮何兩姓居同村落阡陌相連也何氏於馮氏田畔山坡蔭築穴基馮氏以爲越占速訟府幕也六月七日馮氏酌鄉人之爲訟証者何氏料敵之智以己爲將敗也遂出萬死不顧一生之計度舍己之生可以致人之死也馮氏酒闌客散日旣夕矣何氏叔姪因馮正良之過其門也尋釁爭毆亦小詬誶耳遠近鄰居不相聞知也翼辰初八日未卓午而活崇死矣檢閱屍身腫黯自頸以上深如墨以銀鉗探口及穀道鉗色青黑藥毒也銀鉗督匠刻成足色探試真確無可疑也至於

左腮腴紫紅色掌傷也右腋肌紅色拳傷也則爭毆所致均非致命也原相毆之情不特正亮無殺人之心亦並無索毆之意活崇懷舍命之成見一爭而散遽殞其身於人何尤但正亮違例左訟釁由之起量追錢五貫以助收殮亦非枉也若何朝海活崇姪也服毒之故豈曰不知矜其愚不復深究幸也因以諮得高涼毒草叢生愚民枉死者衆其土風也亟令村堡搜斷根株並嚴服親知情之禁以斷其後也例約甫頒猶未戶曉開朝海之一面非姑息也不教而殺不忍爲也後有干禁者毋望倖免也

黃科李華廷陳永科朋謀誣命

審得逆倫滅理逞刁誣告未有如陳永科諸兇之甚者也陳永科與妻李氏茂民凌顯先之僕也三月二十八日李氏手織黃蔴布令永科抱買永科得錢在市買食止剩錢八十文授李氏未幾永科又竊此八十文至四月十八日蚤李氏始知反目相毆李氏憤憤出門不知踪跡二十日牧童報稱一里外楊頭根山樹上有人縊死顯先永科卽同鄰人往視則李氏也時李氏之兄李光廷李進任亦至永科見光廷等至懼其根究毆訟已也避匿不與見顯先同光廷進任永科之母收殮埋塋光

廷等亦以永科業避匿置不復問矣有黃科者永科姊之夫以爲此可居奇也忽於二十四日來顯先家索永科鬻身券顯先不從黃科遂唆永科率科弟亞五赴城索鄧裔旺造狀以人命誣告其主凌顯先又有李華廷者冒爲李氏胞兄連詞續控疊投疊訴真若負異寃者據其刁詞四月二十八日五月十五日六月初二日六月十一日均稱屍骸暴露未殮而平山司驗報及訊李光廷等並鄰佑多人則僉供四月二十一日收殮二十二日埋葬矣查詢前後諸詞皆黃科代永科投遞各犯供如一口科亦頹首無辨李華廷並非李氏宗支光

廷進任等面質難諱華廷見光廷進任之直許也忽變詞以爲光廷令其出告者其閃爍險惡尤可畏矣永科誣陷人命律應反坐且以僕告主尤有常刑黃科主唆代告李華廷冒認屍親俱宜按律究擬羈候拘獲鄧裔旺陳亞五一併定罪乃李華廷黃科二犯先後患病俱服冥誅鄧裔旺係儒學門斗具結願甘悔改併取同役連坐結狀存案其陳永科念係詞非自遞與亞五各責五十板枷三月姑不盡法如再犯定行併論重處不宥也

龍著圖冒兵左控

審看得龍著圖乃小人之無忌憚者也其父龍任

義向曾充守道健步固已氣凌里甲矣著圖尤狡  
黠平時欺壓鄉民不應公務地方排甲積怨已深  
乃因牛食何兆浦田秧兆浦之弟獲牛索賠遽妄  
指爲副府之牛身爲旗牌此亦一時口給禦人耳  
乃復左控府幕差票行拘此衆憤不平公陳所由  
至也著圖恃強凌弱冒兵左控重責枷示猶爲幸  
已任義不思咎子反肆囂張止責十板因其老也  
餘人釋寧立案

黎翼朝覆告余志賢

審得黎翼朝姦頑刁惡之徒也順治十七年延二  
一甲余志賢將田米一二石六斗賣與隆四九甲余

英標英標一死後其子秀生不肖逋糧遠遁田歸里  
長黎贊朝贊朝死其子煥年幼伊叔翼朝于內將  
五斗四升售之陳朝海其二石六升則翼朝招耕  
取租田固黎田糧亦黎糧也乃翼朝巧計隱其所  
賣之五斗四升而思以二石六升之田歸之元主  
余志賢俾承二石六斗之米志賢多承之米即可  
於已名下減少遂有五斗四升無糧之田矣此固  
子孫之利也於是乘造花名冊造入余志賢之父  
戶名指爲志賢遺米疊告買証壓令收受不知志  
賢卽欲受米亦止應受二石六升之田米耳若五  
斗四升不可強壓也研審再四真情始出兩造詞

証僉供如一翼朝至此不覺吐實無諱矣相應將此二石六升之田令秀生退歸志賢若陳朝海五斗四升志賢不願併受着令照舊管業以息其爭但翼朝捏造冊名妄壓良民刁惡之風不可不懲予以不應重杖以警無良餘俱從寬省釋

斷出陷僕李向榮

審得李向榮茂名舊任典史文通繼娶劉氏前夫之孫也向榮因祖母改嫁文通同居數年文通爲之娶媳葉氏通固可謂有恩於向榮者矣乃通不能以禮自檢穢聲外播致向榮有臭污名節之控事屬曖昧姑免深究但通抹去養孫認指向榮爲僕審訊之下全無憑據應斷令向榮葉氏另居其葉氏聘禮銀一十兩仍令向榮償還之文尉姦媳陷僕非人所爲亟逐歸籍毋污吾治

謝舜曆等借縊告命

審得已死謝氏之自縊也因不諳女工變羞成怒一時輕生也其夫魏相九月初三晚市鞋以歸屬其母縫紉其母怒其媳之拙也故委之媳謝氏以爲故彰其短忿出惡言魏相因數妻平日詈姑之語譙訶之此亦兒女常情謝氏同居之姊所目擊也乃謝氏性行躁復遂因羞懷忿是夜潛出後門自縊於菓樹之上初四早魏相尋見報知其妻之

姊謝氏姊之夫盧國翰夫婦二人者同相解其縊者也倩人報知外母聶氏呈報到縣驗視實係縊死並無別故隨經訊明各供着殮去後初六日謝氏族衆謝舜曆等同聶氏三十餘人蜂擁而至輒擅用酒糟洗驗屍身以爲居奇張本而究無一傷可據舜曆復于中關說分派欲索拭淚錢一十四千八百文方免控告魏相貧無以應舜曆等唆使聶氏告縣職審訊之日甫出縣門衆兇干路毆相復又誣稟被相毆傷當經驗其誣罔逐釋乃許誣未遂又唆聶氏以打死女命事詞止瀆憲臺蒙批職確審詳報如虛反坐復行喚訊據各供謝氏自

縊情真至聶氏詞稱打傷全無影響則謝舜曆等扛幫起訟聶氏藉死誣告明矣本應按律治罪姑念索詐未成且聶氏孀老女死舐犢傷情合無干魏相名下量追錢三千文給聶氏聽其修薦伊女謝舜曆謝天惠等據供推諉不知雖係飾詞亦已見其知罪悔遁矣各責示儆均免擬罪謝氏屍棺着令埋厝應否從寬結案伏候批示

丁令畔僕

審得丁渭南之罷官也其家丁胡勝背主而逃比追回而寫券授勝許以工食銀五十兩勝之挾制其主情狀已見矣渭南存銀二十兩未給而以三

十兩許其至家與之此亦退署無人不得不爲羈縻之計耳比渭南卒而勝從其兄丁良震索存貯之銀良震以其弟之有成言也從而與之此亦小人之常態無足怪者但其要挾寫約目無主人爲可惡爾追約塗銷附卷責以二十已足蔽辜至於家人阮鼎倫主死未滿七日居然妻其家婢新菊奉伊誰之命乎是樂主喪也忍心肆逆尤爲可惡矣重責三十板斷令離異其新菊聽幼主另配所生之子着鼎倫領去至於所告騙銀四百兩係接任交盤之項不便坐追姑念萬里從行免擬立案可也

### 梅菜建閘

審得梅菜墟九牌民居舊有水口兩小閘八牌民居不當衝要本無閘址九牌以守閘獨勞欲派均守八牌遂有建閘自守之議此已多事矣比相基起建適當關於相門首于相不願互爭起訟查建閘之議出自八牌閘已起而于相始爭不但難弭九牌之口亦已拂八牌之心矣但查街之兩端皆有大閘足以固圍九牌地當水口宜有二小閘八牌居內元不必設閘也于相旣以風水有礙喋喋來訴准免重建至于九牌水口之閘以後如遇重修着令于相八牌居民任其工費近者任守遠者

任修彼此均平永息爭訟立案存照可也

### 斷定獾總

審得獾之居於粵東西也因其先討賊著功挿處邊郡立總目以統之茂名之總自曹恩始也若楊氏之爲獾總固在粵西其來高也亦祇調取爲曹氏偏裨耳乃目也非總也中間曹玉作賊同族畏逃楊勝基以目領總固一時權宜然亦曹氏之自作孽以召釁也迨後勝基又自犯罪曹氏速訟還其故物楊之失於後猶曹之失於前爾相提而論得失等而總目異目固不可以奪總功罪同而主客分客亦豈容以攘主楊仕烈之爭誠多事矣斷

令曹氏爲總如故

### 廖信智駢殺姦夫姦婦詳府

審看得陳丙戌廖信智族兄之贅壻也丙戌已鰥居址猶傍外氏其與信智之妻黃氏通姦非自近始也信智曾於六月二十九早窺見丙戌自其家出端倪已著實跡無憑隱忍不發乃十一月初四日乘信智守薯夜宿田間丙戌復尋舊盟同衾安寢蓋自十月以來信智在田守薯往往天明甫歸彼蚩蚩者固不虞其夜半畏寒思歸也迨信智歸而剪捷直入正二人同夢之時觸目忿激因以柴刀駢殺之固當比職在信奉到憲檄隨親詣殺所

相驗猶見二屍在床女外男內近頸床簣上下皆有血污牆壁濺血斑斑然卧房以外諸室遍驗並無血痕其殺於床無疑矣迨相丙戌屍形肩臂有棍傷訊其故則信智當時先斬黃氏丙戌驚醒持攜帶在床之小棍急擊着刀落手信智隨奪其棍反擊仆床因取刀畢其命黃氏自前斷喉丙戌由後斷頸刀痕宛然肉攣色紫既絕乃截二首報鄰鳴官若信智者亦可謂烈丈夫矣審訊鄰人鄉老僉供是晚三更信智投報殺死姦夫姦婦衆往同驗果係駢殺在床別無他人助力知情其爲一人下手登時殺死明甚丙戌之弟陳美斯始雖曉曉比當場同驗與黃氏之叔黃聯標俱頰首無言查律載妻與人姦通而本夫於姦所親獲姦夫姦婦登時殺死者勿論合將信智給賞責釋其陳丙戌黃氏二屍各着屍親領埋至陳美斯所告打死架姦審係誣捏毫無証據其中明有唆訟之人但美斯自認錯告應否從寬免究伏候憲裁

學菴類稿目錄

公牘類七

茂名

第七卷 謝案

姦婦梁氏僱殺親夫容桂科詳府 信宜

丁普惠殺妻

陳亞六盜魚擊死何

朝明

覆府西岸民乞均甲

李馥升育女歸宗

狼總爭立

詳銷伍鄒二姓爭山

何志聰誣告爭葬

陳嘉彥負託盜孫氏田券

覆審張官哥誣告母舅曾之庾 二條

陳牛頭四受僱代黃六投繯凌國選家

王志大等私墾官山 王志大私買官山

朱光耀爭婚 符忠垣等誣告李瑞

球發塚 陳英順等冒認贖田

彭兆僊私移謝塚

附錄

廣撫題請開復疏

吏部議覆廣撫開復疏

吏部查覆本部堂司錯議處分疏

學菴類稿

公牘類七

讞案三 茂名

青浦 王原 深 一字  
令詒

姦婦梁氏僱殺親夫容桂科詳府

審看得羅佛音梁氏謀殺容桂科一案高涼之風俗三春賽報神廟競尚歌童唱婦迎神讚禳以為禮彼梁氏者固唱歌婦也歌童羅佛音于三十三年十二月向伊夫容桂科貼賃梁氏偕之遊廟畢此春祈議錢一十千文桂科許允聽從佛音隨唱挾遊桂科不過志在得錢耳迨春色將闌而前錢僅得十分之一桂科固已飲恨矣梁氏與佛音日

夕相偕姦昵情密十千之約置之度外三十四年三月三日遊歌扶龍廟上桂科醉毆梁氏且有賣放他處之語梁氏旣暱佛音又恐拋離子女乃與佛音計殺此獠以爲永好良緣從此可遂也梁固婦人佛亦弱豈非購亾命不足了此於是于三月二十七日購倩羅子文唐萬兆二兇佛音爲梁氏寫立請帖約以二千文爲酬二兇忻然應募至四月二十五日梁氏與佛音約二兇會于東鎮墟僻處告之以期先交錢八十文至次日梁氏聳桂科攜錢六百文同往田禾村糴穀且詭云索佛音欠錢挾之同行而佛音亦導子文萬兆先至楊梅逕

中鴉青河畔狙伏以待及桂科至子文萬兆各執木棍攔路齊擊首傷骨碎登時畢命梁氏與佛音偃肩嶺上視其行事迨桂科氣絕佛音遂將桂科所攜錢六百文脫梁氏首飾衣衫與子文萬兆一以償前約一以爲遇賊被搶令人不疑也于是梁氏投告地方寨長詭以強賊截刦打死桂科爲辭復報其弟桂英庭訊之下各犯自認不諱卷查前署審供及驗過屍傷一一符合羅佛音合依因姦同謀殺死親夫者姦夫處斬律擬斬監候羅子文唐萬兆合依謀殺人從而加功者律俱絞監候梁氏合依妾因姦同謀殺死親夫者律凌遲處死各

學菴類稿  
不枉擬合連人招解憲臺親審定奪

丁普惠殺妻

看得丁普惠之致死其妻陳氏也所以圖陷張嫗也其圖陷張嫗也以己之毆嫗慮嫗死而爲先發制人之計也張嫗蘇義芳之母而蘇永初之叔母也永初與普惠居同村距義方之居尚三里也十二月初十日張嫗視其姪至永初家以普惠曾市義芳棉布逋尾錢一十六文嫗乘便問取普惠以惡聲相加嫗亦詈惠惠毆嫗負傷臥永初家不能歸丁子松普惠叔也充地方役翼日子松知嫗將舉入城訴於官嫗病且老受毆重意其必死也來

告普惠俾爲之謀普惠始欲撲殺其女以反陷之子松以爲此有姻連阻之繼欲擊死其妻子松以爲可遂於是晚普惠伺其妻陳氏熟寢以荔枝木槌於左耳根一擊畢命猶慮其未死復拳毆其左乳胸坎普惠弟媳吳氏聞其謀覩其擊其供如繪普惠子松亦復自承不諱然非天遣十二歲之女孩發之幾何老病之嫗不反爲普惠之狡口所誣耶丁普惠合依故殺妻律絞丁子松合依謀殺人從而不加功者杖一百流三千里不行減一等律杖一百徒三年吳氏合依知欲謀害人不阻當被害之後不首告律杖一百係婦人有力照例納贖

學耆類稿  
是否允協擬合連人招解憲臺親審定奪

陳亞六盜魚擊死何朝明

看得陳亞六與楊旭明黃運高三人於三月初十晚欲盜何朝明塘魚旭明運高攜鋤刨蠅亞六持棍把風迨刨蠅未半而守望之塘主朝明適至亞六迎擊朝明後腦立殞其命旭明運高未之知也時朝明之來偕其姪起元起錦也朝明從東路起元起錦從西路以爲分途則踪匪可以偵盜也豈知分途則勢孤適以便盜乎比起元起錦至而刨蠅者狙擊者棄其鋤棍戴笠從密菁中逸去天新雨道少人行踪歷然尋至旭明亞六之門而止鞫

訊之下各自承不諱亞六應抵無疑其投水自盡足蔽厥辜朝明之妻張氏暨姪起鳳等哀懇免詳以省拖累亦以仇人旣死冤憤已雪也旭明運高本爲行竊尚未得財責懲免刺仍斷出錢十千文給屍親收殮釋逐結案

覆府西岸民乞均甲

奉到發審西岸下甲公呈乞均三甲緣由職隨吊烟丁冊查筭上中下三甲戶丁雖畧有多寡不齊亦不至大相懸絕此間人民遷徙無常增減不一非比田土有定可以均平如一也若因目前些少多寡遽爾更張舊制勢必將來添一戶死一丁紛

紛告爭矣職隨將此語當堂面諭三甲之人各已允服情願照舊并諭目今各衙門並無絲毫擾派不許借名科斂并將上諭和睦鄉里一條反覆申講令其此後共敦情好勿悖 朝廷教化人人悅從合就覆請銷案伏候憲裁

李馥升育女歸宗

看得李馥升明經李寅弼之子也向爲馮家贅婿其妻馮氏有兄女乙姐幼失怙恃馮氏撫育者五年今十二齡矣馮氏之伯遇奇去歲以乙姐許字余姓馮氏不知也今春遇奇遽欲取回乙姐馮氏不允蓋姑姪相依日久不忍相捨此亦兒女之情

所必至矣遇奇躁急遽以包田占人爲詞控寅弼於憲臺憲臺雖不准其狀然寅弼聞之已不勝其憤黃圖書館之毆所由來也於是互相稟訴蒙發訊問研鞫之下遇奇爭田之說原非本旨而馥升措女不與亦無是心職隨喚乙姐試令遇奇帶回而女嬰牽馥升之裾啼哭不已則鞠育之情誠未可泯滅矣馥升以姪女夫而毆妻之伯誠爲龕暴宜詣遇奇家請罪以釋其忿至於此女幼撫於姑而遇奇不謀之馥升夫婦專許氏余而又遽欲奪歸雖此女固馮女也而所爲未免直情而徑行矣似應將此女之聘令遇奇備酒禮至馥升家酬

馮氏幼撫之情而後從容取回庶乎情理兩得其  
平職遵奉憲檄有詳解發落之語未敢擅便理合  
錄供粘卷連人呈繳伏候憲裁

### 狼總爭立

看得狼之有總韋氏之世傳也其祖於前明正統  
時自廣西調來剿寇立功經前者韋以貴也成化  
時復自廣西調來剿寇立功雙花者韋廣昊也比  
撫按各臺以其有功先後分撥絕戶田地令其耕  
鑿聽調此高涼韋氏之所自始也至於覃氏則於  
懷德狼總之下抽撥狼丁覃贊等率兵把守平眠  
覃氏固韋氏所統之兵目也弘治年間狼總韋廷

舉物故獐丁莫盛宗養子覃文旺挾里民保充管  
兵僭端萌于此矣比因各寨不服復歸廷舉之弟  
廷欽正德十一年廷欽年老無嗣又爲莫氏專權  
挾輔廷欽之弟廷現廷現年幼兵目紊亂至十六  
年分爲四目更選覃永淵充狼目嘉靖時狼總韋  
高統死里民因舉永淵攝充千長父子相承數年  
而後復歸之韋妙此覃氏僭亂之由也查萬曆年  
間狼總則爲韋滿源韋劉盛崇禎年間狼總則爲  
韋勝餘韋韜選至本朝順治年間狼總韋太繼韜  
選者也韋有科繼太者也世序相承冊帖猶在至  
康熙十五六年僞逆叛踞高涼覃本仁叔姪乘亂

攘充旣而禍亂削平韋有科得還其故未久有科避徭颺去復爲本仁所有比有科歸始告爭斷還有科死覃本仁覃奇新復起而爭訐公道難泯終以狼總歸之韋捷元歷歷讞墨尚新可考而知矣狼丁黃以勝狡而悍康熙二十三年覃韋相爭之時乘間竊充狼總會而悍陸刑勝爲盜以勝藉端緝盜抄索韋俸禮之室凌辱其婦女勒取其銀錢問擬審案尚在則以勝者故韋氏之仇人也年來覃韋頻起爭端則以勝爲之交構耳職承訊之下考究源流觀察情狀覃奇昌未有必爭之心而以勝之助鬪甚力及訊之諸狼咸直韋而曲黃則其故可知矣職又見韋京科少年喜事不足鎮壓諸狼庭擇韋氏老成韋彩勝充之而以勝則予杖懲此後狼總永歸韋氏他姓不得妄爭給示立案此亦不治之治也是否允協伏候憲裁

詳銷伍鄒二姓爭山

查伍鄒二姓互爭墓地先經訐控到縣移送府縣儒學會同公勘隨據移稱十二月初十日鄒家破土開山一穴伍家亦於是月十二日新蔭一穴問無墓山實情則蔭穴乃空穴也鄒先墓而伍後蔭其間顯有虛指情弊比因兩造皆屬矜監勸諭息爭不坐伍以誣幸已不虞隔越一年伍儲傑又復

撫舊事控憲批縣提審間茲奉憲行註銷事件查  
在康熙三十四年十二月十七日昧爽以前應援  
赦註銷伏候憲奪

何志聰誣告爭墓

審得南舞塘有食會坡下接做戲坡皆卓氏稅山  
也其祖塋在焉卓開運先賣食會坡一穴與何志  
聰之父復賣東畔一穴與梁氏今年又賣做戲坡  
一穴與鄧氏卓氏之業卓氏售之於志聰何與其  
所以訟者昔梁氏之墓志聰曾嚇詐其錢謂此利  
藪耳故智可復用也不知梁氏之地相距尚近鄧  
氏相距在十丈之外且未下墓而誣為挖膊盜墓

相離甚遠而誣為不離六尺周賚予居間而誣為  
梁子貞問其契則無有也問其所告所投之地保  
則咸稱為前後左右卓氏祖塋業田也庭質之下  
塞口莫辨卽志聰亦自覺其多事律應坐誣以警  
刁訟念其年少無知且時值農忙從寬責釋立案

陳嘉彥負託盜孫氏田券

審得小人負心不仁未有如陳嘉彥者也嘉彥從  
弟婦孫氏夫凶子幼所遺田租為其親姪陳心德  
私收蕩廢逋欠官糧由是將田交嘉彥管理託以  
撫孤此去年三月間勸農至梅墟審斷事也田之  
餘利諭嫠婦悉歸之嘉彥屬其殫心經營俟其孤

長而婚娶將田交還案墨尚新不謂人之無良遂起吞噬之念今年正月二日嘉彥遣其幼子國政賀節至孫氏家索閱田契孫氏不與是日適孫置酒召族戶長陳秀等在焉孫氏以斯言告眾眾已不直彥矣乃初五晚孫氏家忽有盜踰墻而入竊其竹籬以去籬之內有檳榔銅盒以盛田契者也次早孫氏覺奔告嘉彥甫入門見彥父子圍聚看契籬盒宛然在旁孫氏遂提之歸檢契已失大半其失者皆腴產也於是就近呈巡檢司解赴縣審究其籬從何來則彥云得之路旁有陳易禎爲証及訊易禎則云初六日東方未明率童子驅牛出

牧行過嘉彥屋後見遺筐在地甫取視而嘉彥踵至以爲此吾弟媳家物也攫之而歸愚哉嘉彥以爲此可以掩盜跡也乎亦思盜果出自他人何不并取別物而惟竊此一筐旣竊此筐何不攜去而投諸路側何以易禎甫見而嘉彥踵至嘉彥至而遽云弟媳家物比檢查文契又何以失腴存瘠也謂非嘉彥之盜之也雖三尺之童亦弗之信矣迨研訊之下一一供吐不諱所匿六契押之取出給還孫氏其田悉還婺婦令其自管嘉彥父子各予重責嘉彥仍枷號示眾以爲欺盜孤寡者戒

覆審張官哥誣告母舅曾之庾 二條

覆看得張官等控曾之庾受偽投獻併包占官哥田產一案前經藏審詳其告受偽投獻不過假借影響以圖倖准審無實據似可無庸深究至於包占田地雖審據各供官哥自有荒熟田米但官哥曉曉狡辨非經丈勘難以定擬是以詳請寬限俟十月終收穫後丈明審結業蒙前憲覆審轉詳批允遵照在案茲委本縣縣丞徐言禎丈明移覆前來職覆加查核張官哥田畝米數相登並無虧缺則其所告曾之庾包占之處委係虛誣但其中不無荒田則歷年賠累亦有苦情庭訊之下官哥雖狡黠于前亦復告哀于後謂田之腴者盡歸曾氏

所存多係荒瘠且伊母一石三斗之奩田又復收回欲贖平棚二斗八升之田米亦復不許以致荒糧終難抵補累無底止揆此則張官哥雖誣告之罪難追而曾之庾目覩官哥母子顛連不爲軫恤情亦欠厚合將曾士奇原給官哥之母一石三斗之奩田仍歸官哥管業併平棚田米二斗八升亦斷歸官哥免其辦價六兩作爲歷年奩田租利至張官哥所告如果得實應照欺隱田糧罪止杖一百律科斷今之庾旣無包占之情合依誣告加三等律杖八十徒二年審係稍有力照律納贖庶情法兩得其平而賠累可蘇國課有抵張文魁等俱

屬附會具呈應從寬省釋

覆看得張官哥狡詐百出之刁民也其初告撫憲之詞所開會之庾包占止稱二契土名四處其有無包占止宜就所開之四處土名查之比委官查勘並無包占已無容置喙矣而官哥猶執稱有糧無田曉曉不已此職所以詳請寬限須查丈官哥之田有無賠累始可塞其狡口也迨委官丈勘官哥田米相登並無賠累更已纖毫無疑義矣而官哥復妄扯他人所賣會氏之田及會氏之祖業撫憲元詞單開所未列之土名累累誑憲駁令職覆丈職仰維憲臺惟恐有一絲未協不足服其心職

遵卽喚訊除他氏所賣及會氏祖業與元詞所未列及已經丈過者不必丈外其張族所賣會氏之田雖非官哥之產悉與丈勘其所開田坵租數多不相符卽如軍營坵開租一百三十四石九斗查丈止得租二十石細鞫佃人田鄰會氏此外並無一坵矣卽官哥亦自供丈完矣忽又變詞指一魚塘稱爲未丈職隨丈魚塘濶七弓長八弓積筭一分五厘此契所未載元詞所未開也卽指塘論租不過升斗耳以二十石之租田而誣爲一百三十餘石卽此一端已可槩見矣其他種種誣罔難以縷指自非職親行踏勘不能盡悉其詐也若短價

之誣撫憲元詞所無歷審並未言及數年來並未  
告及變詞欺罔研審並無實據至於受僞投獻前  
經審詳署府覆審詳院今復遵檄詳訊委係金總  
督委用且受委在前官哥之母再醮在後並非投  
獻免罪應仍照前擬

陳牛頭四受僱代黃六投緇凌國選家

審看得陳牛頭四之縊死于凌國選家也因國選  
女凌氏嫁張觀保觀保出外數年不回凌氏歸依  
母家以居國選傭工遠適其弟國進國品遂以兄  
女爲奇貨國進與黃六爲媒國品與李進發爲媒  
俱各私許爲婚黃六者其名曰黃瑞進根子開之

富屠戶也欲得凌氏爲妾猶恐其父以前壻爲辭  
謀於秀才蘇學轍寫立婚約日後壻歸有言黃六  
擔承其事國選固艷心黃六之財又受學轍之愚  
侮以爲無後患遂許擇日過娶李進發聞之以凌  
氏已之所定恐一旦爲黃六奪娶也乃啣究拆天  
緣事具控黃六自度謀娶有夫之婦爲妾理缺情  
虧不可以官乃巧誘其合夥之陳牛頭四與之青  
蚨一千冒頂黃瑞進至國選家夜半解籬筐絲繩  
自縊身死黃六以此死者爲黃瑞進則其謀娶之  
迹亦可以泯矣卽國選亦以此爲奇策也於是遂  
真認死者爲黃瑞進國選之妻與黃六疊詞報訴

隨經據報委驗果係自盡別無他故及庭訊之下黃六真情畢吐陳牛頭四受僱代死鑿鑿是陳牛頭四之縊死乃蚩蚩嗜利亾身固不足惜然非黃六則彼固不死也斷於黃六名下追錢一十三千文給付已死陳牛頭四之兄遂科領埋屍棺仍重責四十板枷示兩月以儆無良其爲媒之凌國進凌國品爭娶有夫之婦之李進發與謀立約之蘇學轍以有夫之女再許字人之凌國選各犯逐一分別責儆陳遂科弟死於受僱已復受僱得五百文遂指其弟爲黃瑞進以曾聘凌氏爲控亦予責懲餘俱釋逐立案

王志大等私墾官山

審得王志大等閩人也流移茂電兩邑交界之處開耕荒山種植菽麥烟葉甘蔗綿亘數嶺歷有年所茂電之民有爲之勾引者有與之爭利者許訟亦非一日上年茂民柯鳳閣等復聯名具呈控其占山本縣深疾此間仇訟囂風方欲查訊立案永息無益之爭而王志大等以私耕官山氣餒心怯謀之居電之閩人陳伯昌投庇電縣爲負嵎抗提之計電縣之蠹棍交相構扇恐嚇群閩科錢夥告一面電令移開展期一面赴道憲捏欸呈告批發府憲行茂電兩縣會勘志大伯昌又私邀電縣好

事劣生於將勘之時冒爲山主密跡隱伏蓋未勘之先爲閩之蠹電之吏科蝕閩民居電茂者之錢已不下數百千矣比本縣行勘之際見西南一帶荒山坡坨荆棘叢生閩民剪除栽植費力甚多而獲利甚薄且山無灌莽村有流民未始無益甚不必禁也但閩民惟知耕無稅之山之利不肯兼墾附近有稅之荒田茂民不思已爲惰農棄無稅之山不種并棄有稅之田不耕徒咎閩民之專利此連年許訟之所由來也本縣憫念兩造均屬無知業與電縣詳請銷案又奉憲批駁查王志大等詞內誣告差役得錢一欸經府憲審明子虛詳覆則

王志大陳伯昌抗拘越訴夥告夥証捏欸誣陷之罪昭然矣第因事在康熙三十四年十二月十七日恩赦以前援免不坐至於所耕山坡已逐一着令遞認按其耕山之多少令其併墾附近有稅之荒田仍寬其差科以示優恤借無稅之山之利以資有稅之田之牛種於官旣無失額之患於民復無徒墾之勞自此閩民藉墾荒田以安享山利不致受人指摘茂民得人墾荒以免已之賠累亦可相忘無言矣更查荒山斗仄瀉而不承與平土懸殊且沙滲瘠薄種植一二年地力旣盡便不可耕又須另闢閩民勤力故獲其利粵民多惰不能

學耆類稿  
及也倘後之來尹茲土者不察山利之不能常獲  
而或建陸科增稅之議勢必毆閩民悉棄此而逃  
而所陞之稅一增不可復減永爲茂民之累矣後  
之君子不可不深長思也

王志大私買官山

審得林氏之夫周德向有田於油麻塘尾山下其  
後夫死田賣遷於雷州王志大閩人也於康熙二  
十年私耕此山栽種烟葉菽蔗比林氏二十二年  
歸查已業然後志大向林氏批租迨三十一年冬  
志大又與里長蔡耀新私相授受耀新立契志大  
出錢先交五千文旣耀新逋逃明年正月復當捕

衙交五千文完耀新名下逋糧八月林氏方覺控  
之前縣時耀新旣逃而志大又抗不赴質懸案未  
結康熙三十五年柯鳳閣等告王志大林氏復理  
前說審訊之下真情畢露因查茂名之俗山下有  
田卽指山爲已業而不知無稅官山不可私踞周  
德有田之時此山固非其有況田盡賣去而林氏  
尚曉曉居爲山主甚無理也至於蔡耀新以里長  
而私賣官山王志大以流民而始則私占繼則私  
買容士佳等之居間見交皆目無三尺若按之以  
法山應歸官錢應追沒均予以不應重杖猶爲幸  
矣第念事在赦前罪固應免而山坡總屬荒岡

與其奪之仍爲灌莽不如資流民以爲墾荒之資而耀新之錢前後皆完逋糧念其亦非入己相應槩置勿論立案釋逐

朱光耀爭婚

茂民速訟無情而繁者最墓與婚假厭其欲幾於無人不可指爲發塚無人不可坐以拆妻也官山之足有田一丘則此一山皆婪詐之媒矣向有女之家問年一紙則此一紙卽赤繩之繫矣且並不必有田不必有紙封土可以爲祖塋旋而犁之可以爲被發也問年不必出諸其親也人盡可援爲媒氏也嗚呼此余婚塋之式之所爲立變俗之方

惟是之爲亟亟也夫婚姻之故以禮爲信始時之年庚無人不可問迨通禮往還鄰戚共聞非一二入獨知之而獨行之者也如黃鳳昇之女之嫁周承宣爲妾也此五月二十五日事也有黃甲進朱光耀者輒生覬覦嘖有煩言以爲甲進爲媒曾以鳳昇之女年庚送光耀配合伊男也使果有其事光耀應於五月二十五日以後告官矣乃遲至八月十一日黃鳳昇以急救跳殺事來控十四日光耀始以勢奪天緣訐告則其架言無實已不待辨而明矣比庭審之際光耀呈出年庚不過寬一寸長六寸一紙肋耳據光耀甲進供十二月十八日

送檳榔四十枚正月二十八日送檳榔二百枚銀  
耳環一對其重一錢問其禮帖無帖也問同去何  
人親戚知証何人無人也先後兩番止甲進一人  
懷榔而往銜命而還鳳昇之戚無一知者光耀之  
戚無一知者其自供已荒唐矣迨問鳳昇則其舅  
汪國彩先會取年庚送周猺總不諧而止甲進國  
彩婿也覘知而竊寫之鳳昇未知也國彩之供與  
鳳昇同則年庚之真偽未可知也使果出自鳳昇  
而光耀甲進一告一証無他憑據亦難謂之已聘  
而禁其女之不嫁況已于歸四月待詐跳告發而  
後指爲已聘顧猶謂其詞之有情乎姑念訛詐未  
成從輕發落取供立案

符忠垣符祥紫誣告李瑞球發塚

審得符忠垣符祥紫刁訟而喪心者也茂民李瑞  
球於今年三月二十六日葬伊父於譚塘嶺無稅  
官山也至四月十七日忠垣祥紫垂涎婪索瑞球  
不從遂於二十四日以平墳滅骨成訟謂瑞球平  
伊祖墳滅伊祖骨也隨令地鄰保踏看明白喚併  
質訊僉供俱係荒山從前別無墳塚自瑞球葬後  
忠垣等私壘土堆指爲祖墓又鋤地一方指爲平  
墳耳其上但有朱氏之墓離瑞球墓父處甚遠並  
無符家古墓也驗符家所指之墓土未生草則在

瑞球葬父後所立不待辨而知矣乃忠垣祥紫又變詞以爲祖墳不利係在別處遷來此山據其口詞先葬旣無定處遷葬又無月日及問其平墳何証皆僥首曰無証況李墳有草而符墳無草如此而欲直窮到底則指發掘祖墓陷人罪犯惡逆應在不赦之列念係無知姑從寬典忠垣薄責三十板祥紫武生行學戒飭取供立案

陳英順陳元英冒認贖田

看得茂名健訟土風使然然未有如陳英順陳元英鄧王所之刁黠者也順治十二年八月鄧允積將遵一六甲西岸村鷄熟田河湖等地米八斗書

券價十兩售之陳茂水稅過隆四七甲至康熙十二年水湧田荒茂水之孫陳元直逃之廣西元直之弟陳元白轉售於鄧五旦迨五旦死伊子鄧王所於二十九年六月轉售於黃瓊稅過遵三十甲契內載有開荒栽種菓木等語瓊招佃人阮文傑等開種已七年所矣今年八月陳英順陳元英稱田係伊家蒸嘗更名疊控憲臺屢批不准迨後准發經歷司查詳續奉批仰職覆審訊鞫之下情僞畢出陳英順陳元英是一是二名旣閃爍其與陳元白是宗非宗語更支離英順元英卽果係元白宗支亦無有房族所賣之田隔越二手突出告贖

之理況契內並未載有祀田而指爲蒸嘗又何據乎卽據伊所執囑書內稱順治八年買受朗韶十甲糧米四斗又受遵一六甲糧米四斗作爲祀田及查陳元白元買鄧允積印契係順治十八年買受遵一六甲糧米八斗按其年分米數里甲種種不符則欲指順治十二年族內買受之田以爲順治八年伊祖買受之田三尺童子不能欺也如是而欲斷之回贖則合邑之田人人可起而爭之合邑業田之戶人人不得安枕而卧矣至於鄧王所之白契載價銀九十四兩不思陳氏元價不過十兩鄧王所賣黃之價不過十五兩何得中間驟有九十四兩之多明係王所捏寫私契欲圖絕陳元白子孫之回贖希冀黃瓊種熟之後加續入已耳小人喪心至於此極陳英順陳元英冒認他人之田爲祀田更名刁告鄧王所捏契增價均屬違犯應各枷責示衆以爲刁誣者戒其文契前係經歷收藏私衙屢請不發比憲臺押取尚有吝色疊煩檄諭始行繳到蒙發到職業已當堂給還各人收領合併聲明

彭兆僊私移謝塚

高之俗指平地誣人以發塚者夥矣有果發塚棄骸而人安爲故常者矣有以祖父之塚貿人而聽

人發者矣亦有未買而被人發因以爲利者矣蓋皆蠻夷之習未化欲按律而擬之不可勝誅也彭兆僊之買謝氏之地也歷有年所其祖塋在焉兆仙復芻買他姓之地編茆插槿以爲堂構之計卧榻之側不容鼾睡其欲去此纍纍者久矣謝子奇之妻兆仙義女兆仙以子奇與塋之孫金鳳同族叔姪而已又瓜葛也借子奇以遷謝塋固巧計也無如未通之金鳳而子奇又不任其咎掘塚拋骨之訟所由來爾夫發塚大罪也然履其地審其情實則固遷也牛角龍之二塚左昭右穆封土三尺儼然塋制也第非出之謝氏兆仙父子擅行之罪不謂之發塚不可得也然審訊之下彭兆仙願以地歸謝氏併買之他人之地撤屋並歸金鳳而金鳳亦願得地領葬不欲終訟比以事關發塚備文申詳而兩造若崩厥角固求寢爭蚩蚩之氓罪固難容情亦可憫姑准其以地契歸金鳳爲還葬之資而枷責重創兆僊父子免其究擬至於毛色煥等係無干逐釋立案存卷可也

余之斷此獄也固嘗親履其地悉其新舊塋形屋地之詳而兩氏嘒嘒以地界爭甚力蓋第知利之爲重而不知其他比余執法而後兆僊願舍其所甚重以丐其生乃金鳳又惟懼余之執

法無利於己也又固丐余之釋其罪叩頭哀籲情彌迫於兆仙嗚呼一則撤去人之祖塋以固其利一則棄其祖塋以圖其利兆僊固宜殺金鳳獨不可殺乎是何異赤子入井自蹈於死而不自知者耶是而必殺之亦爲父母者所不忍已故余貫兆仙一死而犁其宮削其跡父子囊木決責各數十瀕於死而後釋之而又以似發而實遷之故詳揭以示其有可以貫死之道不然者雖其無知而犯亦必殺無赦庶乎人知塚之不可發而謝金鳳之地則令其遷骸還塋以爲塋域不得私利其地庶乎人知不可因祖塋

以圖利嗚呼此余哀痛惻怛不獲已之苦心或亦不失王者不治夷狄之意乎

附錄貴撫會題行取疏

巡撫貴州兼督理湖北川東等處地方提督  
軍務兼都察院右副都御史加一級臣王燕  
題爲請

旨行取事該臣等看得科道員缺行取知縣一案  
接准部咨令臣將合例廉能愛民之員及有  
卓異薦舉無錢糧盜案者選擇具

題等因除檄行藩臬二司詳確選擇去後茲據  
布政使司布政使張建績同護理按察司事  
平越府知府梁文科公同詳稱黔省各知縣  
內並無卓異薦舉之員惟選擇得銅仁府銅

仁縣知縣王原鎮遠府鎮遠縣知縣紀人龍  
二員各歷任三年有餘奉公守法清廉愛民  
才能夙著勤慎稱職並造具事實冊結前來  
臣等深受

皇上厚恩於吏治人才素為留心今值行取更加  
詳慎遴選得銅仁縣知縣王原才學兼優廉  
潔愛民鎮遠縣知縣紀人龍清介端方慈祥  
勤慎此二員者既無錢糧盜案之未完亦無  
降級罰俸之議處允符行取之例堪備掄擢  
之選者也除冊結送部外臣謹會同總督雲  
貴臣巴錫合疏具

題請

旨康熙四十一年七月二十二日

題八月二十四日奉

旨吏部知道

附錄吏部議覆貴撫行取疏

吏部

題為請

旨行取事文選清吏司案呈吏科抄出貴州巡撫

王燕

題前事奉

旨吏部知道欽此該臣等議得貴州巡撫王燕會

學考類稿  
同總督雲貴巴錫疏稱據布政使張建績護理按察司事平越府知府梁文科將銅仁縣知縣王原鎮遠縣知縣紀人龍二官各歷俸三年有餘奉公守法清廉愛民才能夙著勤慎稱職造具事實前來臣等更加詳慎遴選得銅仁縣知縣王原才學兼優廉潔愛民鎮遠縣知縣紀人龍清介端方慈祥勤慎此二員者既無錢糧盜案之未完亦無降調罰俸之議處允符行取之例堪備掄擢之選等因具

題前來查定例內科道員缺除降級還級革職



還職者不准行取等語王原於康熙三十六年廣東茂名縣知縣任內遞解逃人因脫逃一案例應罰俸一年誤議革職臣部隨即檢舉開復補授貴州銅仁縣知縣在案與革職還職之人不同照例開缺仍行文該撫令其來京俟各省行取知縣一同開列引見其鎮遠縣知縣紀人龍已經奉

旨陞授陝西隴州知州欽遵行文應將行取之處無庸議康熙四十一年九月初九日

題本月十三日奉

旨依議

